

bl. 1.23
ARUBA

Anja 2 - No. 15 - Jan. 1978.

BOULEVARD



**DADDY
BROKKE**

RUFO WEVER A ENTREGA SU ALMA NA CIELO.

Un griep a trece un fin na bida di
RUFO WEVER.

RUFO WEVER a fallece. Na momento cu un enorme publico e anochi di 30 December 1977 tabata presente na e tereno di feria na Santa Cruz pa presencia e cultura mas grandi di nos dushi Aruba, cual ta e festival di Dande, e tristo noticia a drenta cu e rey di nos cultura a wordo yama pa nos gran Señor. Tabata manera cu e anochi ey cu tur su streanan brillante a wordo gedooft pa e noticia tan doloroso aki. Rufo Wever, e pianista cu semper cu su melodianan a sabi di mantene nos cultura na top via di su musicanan folklórico, no ta tin e honor pa por a keda na nos mundo pa scucha of presencia e bendicion di añá nobo canta pa nos gruponan di dande. Mientras cu nos cantantenan ta canta e deseo pa un feliz añá 1978 y e coro ta responde ai nobe, e artista Rufo Wever ya a cumpli cu

e deseo di nos gran Señor, entregando su alma na cielo. Sin duda e noticia cu Rufo Wever a fallece a laga un tristeza grandi ariba nos Isla Aruba. Pero danki na su gran talento cu nos por consola nos mes cu un cantidad di su obranan cu e la laga atras pa nos, graba ariba un cantidad di disco. Notanan musical cu semper lo tene su recuerdo bibo serca nos.

Rufo Wever tabata mas cu un artista pa nos. Rufo Wever ta wordo considera como un miembro den tur familia. Cu su notanan di piano e tabata sabi di drenta den tur hogar. Notanan di piano cu ta manera produci nos dushi idioma papiamento. Un biaha como consuelo y otro biaha e notanan musical ta manera un pintura cu ta marca e marcha alegre di nos bida aki na mundo.



NA HULANDA

Tabata na 1969, ora cu e noticia a aserca mi, cu Sr. Rufo Wever ta keda den Wilhelmina Gasthuis (hospital na Hulanda) pa operacion di su bista. Como un admirador grandi di e gran pianista aki, mi a dicidi di bishite. Mi tabata sintimi orgulloso mes keriendo, cu e unico persona cu sabi, cu e homber drumi den su pyama color blauw cu strepi aden ta un gran artista y pianista. Pero mucho mi no a keda cu mi pensamiento. Un di e verpleegster nan a bin encontra un disco long-play di Rufo Wever. No a dura mucho cu e noticia a corre rond den hospital, cu e persona drumi den e pyama color blauw ta un artista. Un toca-disco a wordo busca pa e verpleegster nan y e disco a wordo toca. Ki bunita e musica di e piano tabata resona y ki mas preciosa e walsnan tabata sali for di e toca-disco. Tabata parce cu ta e solo mes tabata mandando su rayonnan den e kamber, ariba cada cara bo realiza e alegria cu tabata reinando. Tabata un honor pa por a mira despues con varios di e verpleegster nan tabata camna cu un disco cual a wordo firma pa Rufo Wever. Rufo Wever, durante e periodo cu e tabata den hospital, mester a sosega hopi prome cu e operacion tuma lugar. E mester a drumi keto y e no mag draai den su cama of move su cabez. Rufo tabata contento ora cu cualquier persona dune un bishita, pa asina e por combersa matando asina e tempo. Oranan lar-

go e por hiba un combersacion ariba nos musica y cultura, na unda varios vez e nomber di su gran amigo Padu Del Caribe tambe ta wordo menciona. Un di su gran deseo e tempo ey na hulanda tawata, cu e por logra na encontra un grupo di musico, pa e por forma un grupo musical pa asina e presenta na television di Hulanda. "Mi kier demonstra e pueblo di Hulanda e preciosidad cu nos cultura tin," Rufo tabata bisando. "Aruba su nomber mester bai halto." Rufo cu su stimacion pa nos Isla a sigui bisa. Lastima cu su deseo no a wordo logra te leeuw cu mi sabi.

E DIANAN MAS FELIZ DI RUFO WEVER.

Na momento cu Rufo Wever den Wilhelminastraat 33 na Oranjestad dia 8 December 1917 a laga su prome grito como baby resona, su familiaran no por a bin atras cu den e baby ey tin un gran talento scondi. E luna di December cu Rufo Wever a nace tabata un alegria grandi pa su familia. Pero ningun di e familiaran tabata sabi cu e luna di December tambe tabata destina pa nos gran Señor, na cual Rufo Wever den un luna di December mester regresa bek na cielo. Cu un edad hopi joven Rufo a cuminsa haya les di piano. E tabata tin 6 aña ora cu e la cuminsa ricibi lesnan di piano.

Lesnan di piano cu despues a haci di su persona un pianista popular. Musica a cuminsa ta podera di su persona y un gran artista a nace. E ta tin e edad di 15 aña ora cu Aruba a sera conoci cu un orquesta nobo bouw di "Melody Boys", un victoria nobo pa tur amantenan di bon musica. For di e momento ey Rufo no a sinta keto mas y a cuminsa composita un cantidad di cancionnan. Wals, tumba, polka, mazurka y mucho mas di su obranan tabata drenta ariba e mercado di disco. Un di e composicionnan mas bunita, cual tabata e wals Arubanita, a ricibi e honor di por a wordo baila pa su Mahestad La Reina Juliana. Rufo ta tin 24 aña di edad ora cu den un

accidente automobilistico e la bin na perde su braza robz. Rufo den e periodonan ey a bin na pensa cu su carrera como pianista a termina y cu hamas e lo por toca piano. Pero Rufo su stimacion pa musica ta grandi y e la bin na inspira un braza artificial na cual despues di a sacrifica basta tempo pa practica, e la bin na toca piano atrobe. Shownan na television a sigui na Aruba y tambe un gira musical a sigui, caminda Rufo Wever a biaha pa Corsow, Costa Rica, Maracaibo y tambe na Puerto Rico. Tambe Rufo a dedica un di su gran tempo pa traha cilindro pa caha di orgel, cual trabou e la siña di su mes. Un buki musical cu un cantidad di su composicionnan a sali ariba plaza pa tur interesadonan di bon musica.

"Tin tres cos cu a haci Rufo Wever hopi contento den su bida," Sra. Libia Oduber, ruman muher di Rufo Wever, den Wilhelminastraat 33 ta contando na revista Boulevard. Esey tabata na 1975, ora cu Rufo a ser honra cu e distincion di "Ridder in de Orde van Oranje Nassau. Tambe cu su wals Arubanita a ser baila pa su Mahestad La Reina Juliana. I loque cu si a haci hopi contento durante cu e tabata na bida, ta cu e wals Aruba Dushi terra, cual wals e la composita hunto cu Padu Del Caribe, na 1938, a bira e himno nacional di Aruba na 1976. Esa-

kinan tabata e fechanan cu mas a haci Rufo feliz den su bida, Sra. Libia Oduber ruman muher di Rufo ta bisando.

"Na momento cu Rufo tabata bandona su cas pa bai hospital, Sra. Libia Oduber ta sigui bisando, e la bisa: cu awor si e no ta kere cu e lo bolbe mas," e tabata sinti su mes hopi malo. Un poco rato despues Rufo a fallece, tabata un poco prome cu 7'or di anochi. Rufo a wordo hiba na su ultimo lugar di sosiego ariba e fecha di 2 Januari 1978. Atras a keda Wilhelminastraat cu su casnan i edificionan cu propio estilo, casnan cu ta pertenece na nos Cultura. Un caya cu merece pa wordo yama na e nomber di nos gran artista, Sr. Rufo Wever.

Sr. Rufo Wever no tey mas na nos mundo. Pero lo ta sigur cu mayan despues di hopi aña's ora cu nos tur cu ta lesando e articulo aki, no ta na e mundo aki mas, ainda su cancion Aruba Dushi Terra, cual awor ta nos himno nacional lo keda resona cu un echo rond di mundo. O Aruba, dushi terra, nos baranca tan stima. Nos amor pa bo ta 'sina grandi, cun' tin nada pa kibre.

* * *